

天一閣藏明代方志選刊

高淳縣志

2-D56/1402

一九六三年四月上海古籍
書店據寧波天一閣藏明嘉
靖刻本景印原書版框高二
〇·五公分寬一四·五公分

重脩高淳縣誌序

高淳爲縣二十有三年迺正德
甲戌知縣頓侯銳嘗攷邑之故
而創志以傳可謂得爲政之要
矣第縣自溧水割立志據舊牘
成編一時咨詢未周而或泥於
畧攷覈未精而或浮其實故讀

者病焉矧歲移物改而繼治者
不乏是以制作寢備非復創始
之陋民俗歸淳湔滌難治之名
不有纂輯後將何徵哉嘉靖癸
未夏羅山劉侯啓東來知縣事
身先率物百廢具舉間閱舊志
內多闕遺未遑重輯越三載而

政成乃屬教諭賈君宗魯操筆
削之任而體裁條格悉自規畫
時

巡撫廬陵靜齋陳公令下合屬各
以志上於是朝夕從事鉛槧叅
攷舊志摭以新聞三閱月而志
成將圖壽梓屬予贅一言于首

受而讀之維是志脩輯本末賈
君序之詳矣復何言哉然意不
可違敘曰九丘禹貢志祖也後
莫備于成周曰圖曰籍曰志記
同一紀事而爲安擾邦國之本
當時總於大司徒大司馬如外
史小史職方諸氏則專職也其

曰周知名物貫利云云所以辦
壤定賦因俗示教與凡制職布
象之政悉因之而舉故好古君
子每事輒曰攷傳記按圖籍毋
自用焉是豈無所見耶况邑志
之登載周禮所謂名物貫利者
具備且寓春秋勸懲之法柰何

今之從政者唯汲汲於期會簿
書間若志焉者槩眎爲文具漫
不加意嗚呼治不古若由然
哉劉侯斯舉非獨俾一邑文獻
足徵其於春秋勸懲之法焯乎
在人耳目有功於高淳豈小補
哉予不佞僭書首簡亦幸托名

于不朽云

賜進士出身大中大夫江西布政使
司右叅政論功

欽陞左布政使致仕當塗三湖居士
邢珣書

三才圖會

四

高淳縣志序

古者列國皆有史官掌記時事
晉之乘楚之檮杌魯之春秋漢
班馬之史記漢書以歷代之書
史是也今之有誌即古史之餘

國朝

英宗睿皇帝嚮明聽治之暇命文臣

纂脩一統誌以頒行海內先取
郡邑誌以備采錄況仕于是者
非誌則無以考俗而求治生于
是者非誌則無以仰止而進脩
誌之關係大矣余以癸酉春出
知高淳蒞學謁

廟間深惟宦遊一方不可不知民

俗之習尚賢詰之風教名宦之
政績以爲化民成俗之助因首
詢從邁諸生欲得圖誌而觀之
僉謂茲邑之建南二十餘禩未
有能脩之者余喟然嘆曰后世
之郡邑得專社稷山川之祭有
政教法令之施儼古諸侯之國

固不宜無所紀述而高淳爲

京畿屬縣尤非他邑比諸生因進
而請曰此誠高淳之缺典願執
事公餘有以脩而輯之豈非茲
邑之大幸乎余惟曾南豐氏謂
古之良史者其明必足以周天
下之理其道必足以適天下之

用其智必足以通難知之意其
文必足以發難顯之情然後其
任可得而稱也顧余承學曷敢
任此諸生請曰纂邑誌所以備
采錄也脫今回讓弗任厥事則
前無所稽後亦奚自而傳哉遂
不揆蕪陋采衆說摭遺事網列

條分彙成今帙第媿才非充洽
學廢三餘不能無掛一漏萬之
僣豈詳文該事之義哉諸生又
以余忝操觚謂當序諸首簡故
因以終始纂脩之由筆其槩而
鋟梓焉若夫采取有未詳登載
有未悉後當有博雅君子毅然

以筆削爲己任倣漢史之法損益舊典爲一邑成書者此固今日纂脩之志也

正德九年歲次甲戌仲秋上浣
賜進士第文林郎知高淳縣事涿州
頓銳叔養謹序